

四庫全書

集部

欽定四庫全書

集部

石洞集卷七

詳校官監察御史_臣陳化龍

侍讀臣孫球覆勘

總校官編修臣王燕緒

校對官編修臣朱攸

謄錄監生臣吳文垣

欽定四庫全書

石洞集卷七

明 葉春及 撰

惠安政書九

鄉約篇

惟皇制治建府置縣畫鄉分里以奠民庶乃立耆老以
佐令敷政教國家之法十戶為甲甲有首一百一十戶
為里里有長統以縣府布政使司而達于部又於里中

選高年有德衆所推服者充耆老或三人或五人或十人居申明亭與里甲聽一里之訟不但果決是非而以勸民為善是即漢之三老得與縣令並立以事相教者厥任重矣法廢各里亭盡堙沒縣令徒存所謂老人率闢茸輩不過督辦勘委以取刀錐之利拜揖送迎事官長為儀耳有司遂蔑視之嘉靖間部檄天下舉行鄉約大氏增損王文成公之教有約贊知約等名其說甚具實與申明之意無異直所行稍殊耳知縣寡昧叅列聖

之典從簡易之規荆亭以為約所推擇耆老為約正副
餘咸屬之邑中長者初引避不就蓋其習見近日亦懼
有司之蔑之也招以諭文加以束帛明知知縣願與共
治之心乃肯來會置酒設禮與之更始嗟夫張敞鮑宣
漢之三老也孰敢蔑諸

以十有九章聽民訟一曰戶婚二曰田土三曰鬪毆四
曰爭占五曰失火六曰竊盜七曰罵詈八曰錢債九曰
賭博十曰擅食園林瓜果十有一曰私宰耕牛十有二

曰棄毀毆物稼穡十有三曰畜產咬殺人十有四曰卑幼私擅用財十有五曰褻瀆神明十有六曰子孫違犯教令十有七曰師巫邪術十有八曰六畜踐食禾稼十有九曰均分水利姦盜詐僞人命重事方許赴官陳告戶婚田土一切小事務由本管里甲老人理斷不由者不問虛實皆杖六十發回官吏不即杖斷稽留作弊詐取財物處以重罪里甲老人不能決斷致令赴官索煩者亦杖六十仍着果斷循情作弊顛倒是非依出入人

罪律論已經老人里甲處置停當頑民不服展轉告官捏詞誣陷正身處以極刑家遷化外官吏不察所以一概受理一體罪之

凡老人里甲於申明亭議決坐先老人次里長次甲首論齒序坐如里長長於老人坐於老人之上事干別里須會該里老人里甲本里有難決事或親戚子弟有犯須會東西南北四隣里分老人里甲公同議決許用竹篦荆條量情決打不許拘集自來陳告方許辦理聞風

勾引者杖六十有賊者以賊論臣按高皇帝為民之心至矣至矣蓋耆老里甲於鄉里人室廬相近田土相隣周知其平日是非善惡長吏自遠方來至一旦坐政事堂求情於尺牘之間智偽千變極意揣摩似評往史安能悉中重以隸卒呵於其旁箠楚羅於其前視其長吏猶鬼神之不可睨十語九忘口未出而汗交頤何如反覆於鄉里之間若子弟於父兄然得以盡其詞說又況不肖之吏恣為暴虐自以解官挺身去耳無有顧慮者

老里甲其鄉里長久人也即有不平何敢相遠且一被逮往復歲時它無論道途飲食費已不貲萬一觸忤朴擊交下孰與保家產全膚體爭於陌頭釋於閤尾者哉是以知縣欽遵聖制一切小事付諸耆老愚民訛訛或動浮言微察耆老常有惕然之意豈法可行於昔而不可行於今乎抑誠之未至也凡我父老尚共勉旃

以六諭道萬民一曰孝順父母二曰尊敬長上三曰和睦鄉里四曰教訓子孫五曰各安生理六曰毋作非為

諸臣多有解不錄聖謨洋洋嘉言孔彰何解為

以四禮齊萬民一曰冠二曰婚三曰喪四曰祭知縣嘗
上書于朝曰國家制禮達乎庶人俗吏以刀筆筐篚為
事廢而不問三加不舉六禮不修遣女滿車塋死殫家
設席肆筵推牛擊鼓旛幢蔽道鎗黃盈室括髮持衰納
婦誕子甚至於水火為棺槨此弑父之罪也遺祖禰畧
報祀為出門之祭祈名岳媚淫鬼男女雜亂晝夜奔馳
千里而赴之常人琢毘雕題匹庶曳綺履錦酒館歌樓

上切雲漢乃有設容貌倚市門非君子所忍覩也無禮甚矣請責守令重民四教冠婚喪祭禁其靡麗邪僻今謬為令豈敢忽諸蓋六諭所以道民四禮則其事也朱子家禮

成祖已列于學官瓊山丘民又著為儀戶有之故不錄而揭其條件于篇

冠四條

凡冠禮士大夫延賓行於家鄉人行於鄉校以教讀為

賓衣服之美惡酒食之豐儉以上中下戶為差下戶不

可越中中不可越上

三等之戶以田產厚薄為差十項以上者為上戶五項至九項者為

中戶一項至四項者為下戶商賈之家較其所積準是為差無財產者通為一等

凡子弟未冠者不得以字行冠而字之母犯古聖賢及
先世之諱

凡謝賓束帛不必如古人之數上戶絹一疋中戶布一
疋下戶帕一方

凡月朔各鄉教讀以子弟之始冠者見有司有司誨以

成人之道

昏十二條

凡昏禮古有問名納采納吉納徵請期親迎六節今隨俗惟行納采納徵請期迎親

凡男女昏嫁以時男子未及十六女子未及十四成昏者謂之先時男子二十五以上女子二十以上未成昏者謂之過時先時者天過時者病皆不能順陰陽以保太和宜時諭之

凡納採用酒牲果品隨俗上戶通計所費銀不過三兩
中戶不過二兩下戶不過一兩

凡納采納徵請期具書如女氏女氏復書禮也於初定
時書尤不可無者律云雖無昏書曾受聘財亦是但兩
家父母及媒妁或有死亡雖受聘財卒無可據以此悔
親者衆以後必以禮具書無而訟者不聽

凡納徵用釵幣酒牲隨俗上戶通計所費銀不過十五
兩中戶不過十兩下戶不過五兩送禮之人毋得多與

銀錢惟待酒飯

凡請期不分上中下戶惟遣使通書而已禮物不用
凡親迎奠鴈不必酌酒加幣亦有不奠鴈而飲酒者皆
所當革若婚以次日見女之父母設燕者聽

凡婚禮不得用樂有不親迎而用鼓吹雜劇者尤宜痛
革賀昏非禮宜更為助禮物隨宜

凡女服飾隨俗但不可違禁上戶通計所費銀不過三
十兩資粧器物半之中戶不過二十兩資粧器物半之

金匱要略卷之七
下戶不過十兩資粧器物半之上戶從者女一人男一人中戶以下女一人無勿強

凡婦見舅姑用幣餘皆不用明義分也鄉俗見諸親有帛婦不見外姓別男女也鄉俗見異姓諸親及鄉黨令悉正之惟見同姓尊長

凡三等入戶之下聘用酒一坛鵝二隻布二疋茶一合婦荆釵布裙見舅姑而已貧不能具者約正率閭里科少錢助之勿令失時

凡媒妁為人議昏須通二家之情待其許諾毋得欺誑但求成事以貽他日之悔事發罪之謝禮上戶不過一兩中戶五錢下戶一錢溺陰陽年月而不成昏及論財者罪其父母

喪八條

凡居喪以哀戚襄事為主不許匿喪成昏弔賓至不許用幣不許設酒食惟自遠至者為具素食令無服人待之不用酒孝子不許易凶為吉赴人酒席鄉俗旬七會

飲及葬於山會飲皆深為害義犯者有罪

凡喪不得作佛事不得用樂及送殯不得用鼓吹雜劇
楮幡楮鬼等違者罪之

凡居喪始惟食粥蔬素不得飲酒食肉寢處於內禪而
後飲醴酒食乾肉有能用禮者衆共覈實以憑旌獎

凡停柩踰年不葬及溺於風水兄弟相推不葬者各行
戒諭違者罪之

凡致奠上戶用猪羊各一所費銀不過三兩中戶用猪

一所費不過二兩下戶用牲五所費不過一兩不能具者炙鷄絮酒盡哀亦可僭用牛者罪之

凡三等入戶之下葬用薄棺不許焚屍貧不能葬約正率閭里科少錢助之母令暴露

凡火化者忍心害理宜送官嚴懲子孫依律死罪工人重治瓦棺毋鬻於市

凡葬埋宜依旅殯之禮左昭右穆不得淆亂其強佔他人墳地送官懲治

祭五條

凡祭禮所以報本追遠不可不重近世多不行四時之祭惟於忘日設祭前期不齋臨祭無儀祭畢請客飲酒皆非禮也今宜悉遵朱子家禮上戶立祠中戶以下就正寢設韜櫝奉祀歲時朔望如禮

凡庶人祭其先禮也宜如式製為木主不許事觀音菩薩等神像以前事者即毀私藏事之發覺治罪

凡祖禰逮事者忌日有終身之喪是日素服不飲酒食

肉居宿於內曾祖以上不逮事者服淺淡衣禮視祖禰
逮事者為殺

凡時祭屬吉禮上戶有祭田者祭畢胙於教讀及約正
副

凡有疾病惟禱于祠堂里社不許設醮禳星聽信巫覡
違者罪之知縣曰吾民幸生聖世上遵六諭下行四禮
足稱良矣振德者長民職也申以四事一曰明倫二曰
禁邪三曰務本四曰節用瑣科條之願聽毋忽

明倫五條

一孝順父母乃高皇帝口授吾民第一義欲盡斯道宜如孝經孝經曰用天之道因地之利謹身節用以養父母此庶人之孝也蓋分之能為者如此嗟夫父母之德豈有極哉吾父退齋府君老儒也生不肖孤以為晚未嘗易教年十歲授古文尚書十二授詩十四授易十五教觀宋儒之書使從事聖賢之學見吾不以伯氏之喪而有妻又不飲酒喜矣母方夫人見吾端居而嘆問兒

何為對以欲生益於時死傳於後耳母曰汝父言天地
十二萬九千六百年而終即孔子孰傳之強為善耳又
吾常喜道壞麻折檻事母曰吾死不願汝有此也孔子
如清風明月汝如烏風黑雨雷剗剗聲悲夫父母愛子
之心一也即爾父母何異於是吾不幸年十七而喪父
二十二母又喪即今受朝廷恩妻子皆得食民之食不
能一一及于黃泉之下此曾子所以北鄉而涕泣也故
曰往而不可還者親也至而不可加者孝也子欲養而

金文四庫卷之三
卷七
親不待也木欲直而風不待也傷哉既不能養又不能
立身揚名後世以為父母光顯尚何面目立百姓之上
哉爾輩當以為鑒親在愛日不幸而沒將為善思貽父
母令名必果將為不善思貽父母羞辱必不果毋效吾
終身之悔可也

一創家者必立宗法大宗一統小宗四別子為祖以嫡
承嫡百代不絕是曰大宗大宗之庶子皆為小宗小宗
有四五世則遷已身庶也宗禰宗已父庶也宗祖宗已

祖庶也宗魯祖宗已魯祖庶也宗高祖宗已高祖庶也
則遷而惟宗大宗大宗絕則族人以支子後之凡祭主
於宗子其餘庶子雖富且貴皆不敢祭惟以上牲祭於
宗子之家宗子死族中雖無服者亦齊衰三月祭畢而
合族以食朞而齊衰者一年四會大功以下世降一等
異居者必同財有餘則歸之宗不足則資之宗族大事
繁則立司貨司書各一人宗子愚幼則立家相以攝之
各修族譜以敦親睦或有骨肉爭訟者衆共罰之若肯

同居共爨者衆相褻勸

一孔子宰中都制為別塗之教蓋禮始於閨門男女必有別妻妾必有序宮室必辨外內男子毋得晝寢于內婦女毋得踰閭行市雖奴婢亦必動遵禮度其有貞節衆共歌揚以為閨門之助聞于有司

一曾子問曰取女有吉日而女死如之何孔子曰壻齊衰而吊既塋而除之夫死亦如之蓋既婚媾將期百年豈願有此誠痛之矣今男女未婚而死必索聘財至於

相訟一何薄也又女已嫁常庸奴其夫亡抵他人官以
法合之則至決絕而死嗟夫宋人之女嫁而夫有惡疾
竟不改也即庸不猶愈於疾乎又夫死不嫁從一而終
者也燕有貞鳶有烈可以人而不如鳥乎高皇帝以衆
人待人能秉斯義則表其閭載于令甲不能免喪而嫁
又多乎哉實兩年耳今愚婦夫死未寒輒歸別室朝尚
括髮夕即畫眉忍矣忍矣環而視之欲以此婦為利又
嘗數輩此皆無行義之尤者也昔孔子為政而公慎氏

出其妻蚤正以待之也幸得備位為邑表率不能宣明教化視事朞月其風未變重使父母受其耻咎在知縣各宜戒諭犯者如法

一吾民甘其食美其服安其俗樂其業田廬妻子雖有強暴立于其傍莫敢睨者非君恩哉是故民者出粟米絲麻作器皿通貨賄以事其上者也宜必服官守職而後能盡君臣之道力農奉公供輸以時庶人之義盡矣如是又何箠楚之加

禁邪七條

一惠安廣輪厓八十里淫祠至五百五十有一噫何多也頭會箕斂醺酒推牛迎親慶誕設齋建醮或至舞鬼掉舟樂神會首不能具則出息以充之為位頭者世而袖首蚕食其內病不得藥死不得葬甚至男女龐雜有不可道者矣知縣傷之下令墮毀遵裕陵改建社學二百二十有一然聞民尚移象私寢或言予出城門鬼還廟宇者甚惑父老諭之

一禁止師巫邪術律有條矣今愚民自稱師長火居道士及師公師婆聖子神姐之類大開壇場假畫地獄私造科書偽傳佛語搖惑四民通交婦女或燒香而施茶或降神而跳鬼設齋則糜費銀錢建醮則喧騰閭巷暗損民財明違國法甚至妖言怪術蠱毒採生興鬼道以亂皇風奪民心以妨正教不知死生有命富貴在天且如師巫之家亦有災禍鬼神憑藉何不救之若言免禍求福盡假其功則是貧者盡死富者長生此理甚明人

所易曉皇上崇祀真儒大啟文教注祠既毀邪說當除
凡我四民毋仍舊習禁約之後師長等及無牒僧道各
項邪術之人赴縣自首歸還原籍別以治生違者如律
一王制用器不中度不粥於市布帛精麤不中數幅廣
狹不中量不粥於市五穀不時果實未熟不粥於市木
不中伐不粥於市魚鱉不中殺不粥於市故孔子為政
器不彫偽百姓遵用韓延壽者賣偶車馬下里偽物者
棄之市道今後我民有賣鬼面諸淫巧物與斗斛秤尺

不如較勘市而二其價者并罪之

一邇來風俗好訟蓋聞亂後生理未遂人性漸澆或撫
無証之詞或舉已結之牘或窺上意或復私仇銖兩必
爭睚眦必報一旦被逮其喪倍尋陰險詭詐者殺身之
藥貪婪凶虐者滅家之斧強梁者不得其死教唆者必
逢其後可不畏哉上失其道民散久矣余甚自愧今與
民約凡有父子兄弟夫婦不相親睦及爭財異業以至
飲酒博奕鬪隣罵里淫盜誑騙等項以每月朔望兩日

相會亭中自陳或族長族人代陳小事不平父老同衆
勸戒事關大惡明言責救如有不從乃聞于縣若城中
則子躬往不勸責者有咎

一知縣兒時嘗與人奕先大人瞰之以為賭也撻之二
十令中夜思至輒氣絕蓋父母于子恒慮其賭賭則窮
則盜小人犯刑君子滅義靡不為矣知縣視爾小民猶
大人視不肖孤也戒之哉戒之哉不戒治以律父老不
教戒甲總不覺舉連坐雖不賭財物而鋪牌演戲奕棋

雙陸玩好骨董學習彈唱琵琶三絃羌管番笛廣收花石獵養禽鳥作諸無益者一并罪之

一民間酒店假以賣酒為名實乃淫人取利大傷風化犯者重罪

一黷明毀鄉校子產止之譬諸防水蓋士傳言庶人謗固為政之資也然高皇帝於投匭告人者罪之特重至於絞見者將送入官杖八十被告言者不坐豈非聖讒說殄行哉近來此風尤盛爾鄉先達張大夫曰道不可

得見矣長民者謹勿以魯而之齊哉余懼其至齊也戒之戒之犯者緝獲如律不赦

務本三條

一先王之教其民也行不出彞倫之外士不出畎畝之間漢書曰餘子遣入序室所謂餘子者父在則子餘兄在則弟餘故天下生員皆名子弟其職在入孝出弟而所以教之者尤莫切於出作入息之期也後世分教養為二一登講堂永耻民事有父兄荷蓁立而子弟衣輕

表見達官貴人惡人必竦然起敬見胼手胝足雖至親而赧然愧之者雖雖冠服如士人其孝友之實曾不如塗之人矣肅皇帝敕入學生徒必求子弟曾知稼穡有孝弟實行者取之篤實父老以耕讀為事者量加賞犒以廣子弟孝友務本之心至於興水利以便農民招農民以辟土地責有司舉行真與周室比隆矣予忝為民父母不敢素食常行阡陌勞問勤苦崇福荒田已分有力者墾官埭新埭變為滄海亦召好義者築之可以

作乂又效召信臣為民作均水約束開西洋故道使六七兩都咸得灌溉之利餘以次行恐不能盡之也凡我父老宜常勸督服勞田畝子弟亦宜聰聽長者之言或有某田未墾某水宜疏悉來白予不憚黎面

一聞民有私謔者曰吾自三月至六月粒米入口者死言皆食麥而他邑亦嘆我為人麥籠謂麥貯籠中猶淵明瓶中粟也然則吾民厥惟艱哉張襄惠曰吾邑廣輪之數止八九十里然且包山林並原隰可耕之田不能

三之一斤鹵者幾半上承會府下引漳潮之衝并日以
馳不足也三復其言而悲之地瘠他邑而賦又不可獨
後可奈何吾民勉之又聞李大夫言列市吾土皆他郡
縣人也錢盡外出能得外錢獨糊布耳然麻乃買於他
所利減其半又崑夷亂後家無杼柚為繒賣之利又減
半今後不種麻與以繒賣者同里布之罰

一邑無深溪大澤之注東南諸郡常病旱人勤稼穡枯
槁之聲達于晝夜旱月涓滴之水以死守之往往鬪訟

比平苗則稿矣以後須敦讓畔之風彼此兼利强者罪之

節用二條

一四民之家有千金之產者有一金之產者儉者以一金而有餘奢者以千金而不足如聘婦則虛張儀物嫁女則多耀資粧喪葬則金投于酒肉之池祠醮則財赴於緇黃之壑鬪勝則假借為真設酒則以無為有是皆不能行四禮所致也夫四禮者至易至簡易知易行不惟能反淳風而亦可省濫費所有四禮條件各宜遵行違

金匱要略卷之三
者許人首告治罪

一凡一年之用置簿開算糧役之外所有若干以十分
均之留三分為水旱之備一分為祭祀之需六分分十
二月之用若閏則分十三月之用取一月合用之數約
為三十分日用其一凡茶飯魚肉賓客酒漿子孫紙筆
束脩及奴僕等費皆取諸其間可餘而不可盡用至七
分為得中不及五分為太嗇其所餘者別置簿收以為
冬夏裘葛修葺牆屋醫藥喪葬及弔喪問病時節饋遺

毋得侵過次日之用一日侵過無時可補此窘匱之漸也宜加節嗇免致于求親舊出息通借以招恥辱若速客置酒當知會數而禮勤物薄而情厚之義酒或七行或十行量洪者不過十二行果止五品散五品羹三品割截二品器用甕漆雖親戚上客一以為準其有過用多品者共罰之月吉乃屬民而讀法書其善者惡者老人以木鐸徇于路望亦如之凡民間須要講讀夫誥律令敕諭老人手榜及見丁着業牌面沿門輪遞務要通

曉法意有司時加提督每鄉每里各置木鐸於本里內
選年老或殘疾不能生理之人或瞽目者令小兒牽引
持鐸徇行本里令直言叫喚孝順父母六旬使衆聞之
勸其為善毋犯刑憲其持鐸之人秋成之時本鄉本里
內衆人隨其多寡資助糧食臣按京縣高皇帝時月朔
尹引耆老等赴御前聽宣諭君臣一體誠三代之盛也
今設聖諭牌一置于亭中儼天顏之在上馬城中兩首
知縣引耆老等跪聽如儀各都耆老率衆行禮兼講家

禮條件以家禮乃文皇帝所頒禮亦法也又國朝旌善
亭榜書民之善惡即周禮屬民讀法考其德行道藝而
勸之糾其過惡而戒之之意而近行鄉約置記善記過
簿亦此意也今日登簿積之不已則登于亭可不畏哉
可不勸哉又教民榜慮鄉村散遠則一甲內置木鐸一
易為傳曉以便民也各都遠者或一二十里可悉會乎
故以鐸傳之不使奔赴又榜中每月六次今止朔望從
省也儀節凡會者登名于籍每月直月二人自朔至望

一人直之自望至朔一人直之至期直月設聖諭牌子

堂北誥律案于堂南

上置誥律敕諭老
人手榜四禮條件

擊鼓集衆者三

城中則縣
官先拜

耆老率衆北向跪贊宣聖諭直月立聖諭東

宣畢僉曰諾贊俯伏興五拜三叩頭分班老人持鐸出

徇於路必司贊讀誥律教讀二人北面一讀大誥敕諭

每人手榜各一條一讀令三條或五條畧為解諭即撤

牌位皆坐教讀正坐稍東南向耆老坐堂東西向會中

年尊者坐堂西南向餘以齒為序東西相向以上為上

教讀逐一講解四禮條件

城中則縣官正生耆老旁列教讀北面講禮

於是

有善者衆推之有過者直月糾之詢其實狀無異詞乃

命直月書之

善即遵六諭行四禮者過反是

過而能改後會改書如無

可措不必吹毛以至忿爭訟者平之相揖而退

惠安政書十

里社篇

惟皇制治建府置縣畫鄉分里以奠民庶乃立社稷以教民事鬼神社土人也稷穀神也民非穀不養非土則

穀無所殖是以聖王修之所從來尚矣我高皇帝即位
尤敬鬼神之祀立大社稷統天下司府州縣縣有社稷
統各里里各有社稷具洪武禮制又懼民不知報作大
誥以戒諭之敬而不黷故神降之嘉生今有司惟祀縣
社稷各里多廢乃立淫宇一里至數十區藉而名之曰
土穀之神家為巫史享祀無度夫國制壇而不屋天子
為百神宗祀典不載孰敢冒而享之乎故余毀之盡立
里社如故嗚呼民有侯禳禱榮之事亦不患無所矣兆


社壝于里辨方正位因其樹而封之按洪武禮制每里一百戶內立壇一所祀五土五穀之神州縣壇制東西二丈五尺南北如之高三尺

用營造尺

四出陞各三級壇下

前十二丈或九丈五尺東西南各五丈今不能然宜因地而廣狹之壇廣則一丈二尺狹則六尺以法地數壇前不過六丈可也繚以周垣四門紅之北門入地狹隨宜一門常局鑰之石主長二尺五寸方一尺埋於壇南正中去壇二尺五寸上露員尖餘入土中神牌二以木

為之高二尺二寸闊四寸五分厚九分座高四寸五分
闊八寸五分厚四寸五分硃漆青書祭設于壇乘以几
祭畢藏之几高一尺九尺廣一尺九寸長二尺三寸壇
前縣鼓以備集衆行事社祝守之



以二祭禮神一曰祈二曰報仲春社日行祈禮宿眠滌濯省牲鑊三獻祝瘞乃燕而誓每歲輪一戶為會首後見

里主壇事遇社

大統歷社日

先期率辦祭物羊一豕一酒果

香燭隨宜前祭一日會首及預祭之人各齋會首先遣執事者掃除為瘞坎于西北隅深取容物會首洗滌廚房鑊以淨室為饌所至晚宰牲執事者取毛血與祭器置于饌所器用瓦甕祭日未明執事者于厨烹牲設神位于壇上五土居東五穀居西設讀祝位于壇上居中設

會首拜位於壇下俱南向設預祭人位於其後引禮及
諸執事人位又於其後執事者實祭物于器解牲體置
於二俎置酒于尊書祝于版祭物既備執事者各舉于
神位前燃香明燭會首以下各常服盥手就拜位執事
者尊中取酒立于五土神位之左通贊唱鞠躬拜興拜
興平身會首以下皆鞠躬拜興拜興平身唱瘞毛血執
事者取毛血瘞于坎中引禮引會首詣五土神位前唱
跪會首詣五土神位前跪舉盃執壺者酹酒引禮唱三

祭酒會首三祭酒訖引禮唱俯伏興平身執壺者詣五
穀神位左引禮引會首詣五穀神位前唱跪會首詣五
穀神位前跪舉盃執壺者酌酒引禮唱三祭酒會首三
祭酒訖引禮唱俯伏興平身會首俯伏興平身引禮唱
詣讀祝位讀祝者取祝立于讀祝位之左會首詣讀祝
位引禮唱跪會首跪唱讀祝讀祝者跪讀訖興置祝于
案引禮唱俯伏興平身會首俯伏興平身引禮唱復位
會首復位通贊唱鞠躬拜興拜興平身會首以下皆鞠

躬拜興拜興平身執事者徹祭物讀祝者取祭文焚瘞
于坎禮畢會飲先令一人讀抑強扶弱之誓其詞曰凡
我同里之人各遵守禮法毋恃力凌弱違者先共制之
然後經官或貧無可贍周給其家三年不立不使與會
其婚姻喪葬有乏隨力相助如不從令及犯姦盜詐偽
一切非為之人並不許入會讀誓詞畢長幼以次就坐
盡歡而退務在恭敬神明和睦鄉里以厚風俗

祝文

維年月日泉州府惠安縣某鄉某里某人等謹致祭于
五土之人五穀之人曰惟神叅贊造化發育物物凡我
庶民悉賴生植時維仲春東作方興謹具牲醴恭伸祈
告伏願雨暘時若五穀豐登官賦足供民食充裕神其
鑒知尚享仲秋社日行報禮如春亦用大統歷社日祝
詞改東作方興為歲事有成改祈告為報祭祭器用牲
桶二鍋五牲匣二祝板一酒尊三各連幕酒勺一瓷觥
六瓷碟十二香爐一盥盤一帨巾一祭品豐儉隨宜人

不過出銀二分貧者半分極貧者勿強仍令與會凡春秋二祭當遵古人祈年報賽之禮務在精誠不許裝神舞鬼以為盛會違者罪之

以六號事神一曰告二曰禱三曰誓四曰罰五曰禳六曰會有事則告凡立鄉約延教讀編保甲等皆告于社民自他境來初預鄉約保甲等謂之入社亦以告告畢即書姓名于籍其有過罰而不悛者逐之入社亦以告之告畢約正會衆於籍除名凡告社祝鳴

缺

約衆

皆至立于壇前社祝唱跪約正以下皆跪社祝抗聲告
曰某年月日約正某等為某事敢告于神惟神總明正
直好善惡惡凡食此土之穀者孰不昭鑒尚冀默相以
底成功使善者受福惡者受殃無作神羞告畢告正以
下皆再拜而出有求則禱凡民有水火盜賊疾癘刑獄
等事必禱于社其繫一鄉福祥痛苦者約正令教讀為
文付社祝行禱禮凡禱雨先一日齋戒約正等禁鄉內
屠宰黎明帥約衆詣社取齋社祝伐鼓十二聲用牲于

社唱鞠躬再拜平身約正以下皆鞠躬再拜平身約正
詣讀祝位跪社祝讀祝文曰惟某月日鄉約正某等敢
禱時雨于五土之神五穀之神皇皇上天照臨下土集
地之靈神降甘雨庶物羣生咸得其所惟神俯從民願
某等不勝瞻望哀懇之至祝畢唱鞠躬再拜平身約正
以下皆再拜而出次早禱亦如之惟不用牲必得雨乃
止若雨多求止雨則鳴鼓百聲用牲于社祝曰雨已太
多五穀不和人民失養傷如之何社靈社靈幸為止雨

調變陰陽陰民所苦禮亦如之謝得雨及止雨俱用牲
于社有疑則誓父老聽一鄉之訟如戶婚田土財貨交
易等不肯輸服與凡疑難之事皆要質于社而誓之凡
誓鳴鼓七聲社祝唱跪誓者皆跪社祝宣誓詞曰某人
為某事若有某情敬誓于神甘受天殃惟神其照察之
誓畢誓者三頓首而退有過則罰凡鄉約內有違六諭
悖四禮糾而不悛及社學保甲諸人有犯者約正等會
衆以其人拱立于社伐鼓十聲社祝唱跪犯者跪抗聲

攻之曰某有某過不悛告罰于神尚冀自今改於其德
神降之休犯者對曰某不肖少失教以辱先人以為族
黨羞神將降殃昭受大戮今聞過願脩身改之再拜而
退既罰復不悛約衆告于神逐之出社除名于籍若不
肯罰與事情重者約正等聞于有司不聞發覺連坐有
患則禳淫祠既廢修齋念經咒水書符師巫之徒終不
可化者難以誅戮皆分遣各社充社夫每遇水旱癘疫
為人患害之時使之行禳禮鬼有所歸乃不為厲遵洪

武禮制每里一百戶內立壇一所祭無祀鬼神歲三祭
春清明秋七月十五日冬十月一日祭物牲酒隨俗其
輪會首及祭畢會飲讀誓等儀如里社

祭文

惠安縣某鄉某里里長某承本縣官裁旨該欽奉皇帝
聖旨普天之下后土之上無不有人無不有鬼神人鬼
之道幽明雖殊其理則一故天下之廣兆民之衆必立
君以主之君總其大又設官分職於府州縣以各長之

各府州縣又於每一百戶內設一里長以綱領之上下
之職綱紀不紊此治人之法如此天子祭天地神祇及
天下山川王國各府州縣祭境內山川及祀典神祇庶
民祭其祖先及里社土穀之神上下之禮各有等第此
事神之道如此尚念宣室之中無祀鬼神昔為生民未
知何故而沒其間有遭兵刃而橫傷者有死于水火盜
賊者有被人取財而逼死者有被人強奪妻妾而死者
有遭刑禍而負屈死者有天災流行而疫死者有為猛

虎毒蟲所害者有為饑餓凍死者有因戰鬪而殞身者
有因危急而自縊者有因墻屋傾頽而壓死者有死後
無子孫者此等鬼魂或終于前代或沒于近世或兵戈
擾攘流移于他鄉或人烟斷絕久缺其祭祀姓名泯沒
於一時祀典無聞而不載此等孤魂死無所依精魄未
散結為陰靈或倚草附木或作為妖怪悲號于星月之
下呻吟于風雨之時凡遇人間節令心思陽世冤杳杳
以無歸身墮沉淪意懸懸而望祭興言及此憐其慘悽

故敕天下有司依時享祭在京都有秦厲之祭在各縣
有邑厲之祭在各府州有郡厲之祭在各縣有邑厲之
祭在一里又各有鄉厲之祭期於神依人而血食人敬
神而知禮仍命本處城隍以主此祭欽奉如此今某等
不敢有違謹設壇于本里以三月清明日七月十五日十月一日率領某
人等百家聯絡于此置脩羹飯肴物祭于本里無祀鬼
神等衆靈其不昧依期來享凡我一里之中百家之內
倘有忤逆不孝不敬六親者有姦盜詐僞不畏公法者

有拘曲作直欺壓良善者有躲避差徭靠損貧戶者似此頑惡奸邪不良之徒神必報于城隍發露其事使遭官府輕則笞決杖斷不得號為良民重則徒流絞斬不得生還鄉里若事未發露必遭陰譴使居家並染瘟疫六畜田蠶不利如有孝順父母和睦親族畏懼官府遵守禮法不作非為良善正直之人神必達之城隍陰加護佑使其家道安和農事順序父母妻子保守鄉里如此則鬼神有鑒察之明我民無諂諛之祭靈其無私永

垂昭格尚享

祭告城隍文

惠安縣某鄉某里里長某率領人民某等聯名謹具狀
告于本縣城隍之神今來某等承奉縣官裁旨遵依上
司所行為祭祀本鄉無祀鬼神事欽奉皇帝聖旨普天
之下后土之上無不有人無不有鬼神人鬼之道幽明
雖殊其理則一今國家治民事神已有定制尚念冥冥
之中有等不在祀典之神不得血食之鬼竟無依私顯

靈怪悲號于星月之下呻吟于風雨之時憐其慘悽故
敕天下有司依時享祭鄉村里社一年三祭仍命禮請
本處城隍以主此祭鎮控壇場鑒察諸鬼等類其中果
有生為良善誤遭刑禍死于無辜者神必達于所司使
之還生中國來享太平之福如有生為凶惡身死刑憲
雖獲善終出于僥倖者神必屏之四裔善惡之報神必
無私欽奉如此今某等不敢有違欽依于某年某月某
日就本里設壇謹備羹飯肴物祭享于本鄉無祀鬼神

等衆然幽明異境人力難為必資神力庶得感通今特
虔誠告于神先期分遣諸將遍歷所在招集本里鬼靈
等衆至日悉赴壇所受祭神當欽承敕命鎮控壇場鑒
察善惡無私昭報為此謹具狀告本縣城隍之神俯垂
昭鑒謹具狀祭厲日俱行儺禮或十月不儺移于臘月
謂之大儺儺用狂夫一人蒙熊皮黃金四目鬼面玄衣
朱裳執戈揚盾又編茅葦為長鞭黃冠一人執之擇童
子年十歲以上十二以下十二人或二十四人皆赤幘

執桃木而噪入各人家室逐疫鳴鞭而出各家或用醋

炭以送疫若臘月大儺黃冠倡童子和曰甲作食殂腓

胃食虎雄伯食魅

句騰簡食不祥

句攬諸食咎

句伯奇

食夢

句強梁祖明共食磔死寄生

句委隨食觀

句錯斷

食巨句窮奇騰硯共食蠱

句

凡使十二神追惡凶

句赫

汝軀拉汝幹節解汝肉抽汝肺腸汝不急去後者為糧

此乃古禮雖孔子所不敢廢也後世此禮廢絕每逢災

疾乃至禳星告斗作諸無益其傷民財甚矣故今合時

制於古以便民從俗亢旱請雨畧倣董仲舒法約正以下齋戒三日以水日雩祭于社而請雨行禮如禱儀以土為龍身皆黑而尾白長九尺使丈夫八人小兒八人皆衣黑衣丈夫舁龍小兒謹呼曰烏龍頭白龍尾小童求雨天公喜自北而南又自南而北乃歸于社息焉復取五蝦蟇其中而閉之及雨則詣社行謝禮用牲若雨不止及大水則縈朱繩于社伐鼓攻之雨止水消謝如得雨儀有慶則會春秋祭畢行會飲禮已見前正月元

夕為歲始臘月大儺為歲終亦許會飲于社教讀製相
戒之詞以見無已太康之義或令童生歌七月之詩一
闕或習士相見禮或行投壺禮或行鄉射禮務在雍容
揖遜敦崇古雅須用歌詠勸酬使人觀感不得酣唱邪
曲演戲雜劇以導子弟未萌之欲

惠安政書十一

社學篇

惟皇制治建府置縣畫鄉分里以奠民庶乃立社學以

養蒙歛賢才社學者一社之學也百又十戶為里里必有社故學於里中者名社學云自庠序教廢民之子弟皆不復教於里而輒入其縣州府學其童子事家不習未知室家長幼之節而業已學先聖之道講朝廷君臣之禮矣猶築千仞之臺而基不先顛覆是懼何高可升洪武八年詔有司立社學矣顧時有司倚以為奸民有餘子不遣入學父子二人相與業作朝夕之謀是急反句攝而迫驅之往往以貨為取舍民之見收如重役然

愁苦之氣鬱而上聞高皇帝為是焉憂又值天造初直
發艱哉之嘆而止今觀大誥所以罪責不肖之吏至嚴
重矣正統元年既設提學之官又仰念高皇帝之憂之
嗟也於是詔天下縣里設一學如故累朝因之敕提學
官必有司督焉嗚呼已致其廢莫任其興有司之罪奚
逭夫里一學足矣所在不拘則又見於教民榜豈非期
便民耶惠安近雖以三十里為邑然至邃谷詩書之聲
不絕每選學官子弟抱藝就有司而試者不下千人蓋

斌斌盛也俗故尚鬼淫宇至五百餘學者或與鬼並坐而誦非所以止慝反經而登於先王之道也故毀之盡擇其宜為學者葺之凡二百一十有二隨里居疎密而多寡其數便民第於各都標一大者為大館云前期臘月父老擇宜教讀者聞有司有司試之選其學者行者開歲正月父老率錢具禮遣書聘之屆期乃恭迎之嗚呼吾觀惠安鄉學而嘆俗之無節也聞某所有子弟則竊竊焉夙具以要之奪者倍其具計不可奪而出於勢

勢有力者亦當挾以為市故一生而睨者幾師一館而分者幾人父兄無適從子弟廢學至有毀面囚首關於有司之庭吁可痛也天生四民各食其職業已屈首受書欲工無技欲商無貲求升斗於口舌之間豈曰不可然工商者固重利謀也所業之謂何而因以為利夫詩書所載孰非禮讓之道仁義之談哉不以教人是不忠也述而為教是自叛也吾見其口欲言而忸怩汗淫淫而至踵矣且身之所教為尤甚何則青藍之勢然也愛

子愛弟期待何如情欲未開而遽教以爭奪其若異日
何知縣自傷無狀不能改化不忍再覩其事著為迎師
之禮父老其敬行之爭者挾者罰無貫前歲臘月父老
會各鄉長老隨鄉里大小子弟多寡居止遠近度宜開
館幾所請師幾人與各父兄從容議定皆由心願然後
開某社學弟子若干名序其年齒鄉里父兄籍貫請師
某何色人并其年齒鄉里籍貫書為一冊送縣會考子
弟無故不入學者罰其父兄所請教讀必學行兼備端

重有威生員儒士不用罷吏及非儒流出身之官或丁
憂生員與因行止被黜者其四方流寓蹤跡無常尤當
精擇俟縣選中父老率錢每名無過三十文多則絹一
疋侑以羊酒少則布一疋侑以鵝酒具書曰某頓首某
先生執事凡聞先生學行醇懿里閭跂仰之日久矣古
者士大夫居鄉則尊以為父師子弟從之而孝弟忠信
之俗成焉今率某鄉子弟受命願先生之惠教之也敬
具不腆之儀因執事者以聞擇子弟能將命者齋赴其

家再拜以請教讀辭復再拜固請諾乃復命屆期父老
會各父兄躬請其家再拜迎之退乃盛服候於社學門
外諸生候而前至門讓主人入而右教讀入而左至階
讓主人降自東階教讀升自西階至堂讓主人東向教
讀西向行再拜禮師席南向主人各前布席席定諸生
行四拜禮以次獻茶具飯畢辭而退就館入便室前期
齒列諸生門內東西壁間質明咸至序兩階下父老以
下入警戒辭出乃開館館堂設先師位父老同各父兄

入與教讀上鄉行四拜禮畢直月抗聲致辭曰凡與此會者以孝弟忠信為本其不順於父母不友於兄弟不睦於宗族不誠於朋友言行相反文過遂非者不在此位教讀拱手應曰諾直月復抗聲致辭曰凡與此會者以立教明倫敬身為本其聞善不相告聞惡不相警禮俗不相交患難不相恤陽善陰惡二三其德者不在此位父老以下拱手應曰諾相與揖遜而出先生就坐諸生以次執事贊禮乃升堂侍教其未冠者從俗總角已

冠者平頭巾絹布直領不許紵絲紗羅出入不許騎從
輿馬侍於先生雖富貴冬毋爐夏毋扇坐以茵施教以
六行六事六藝而日敬敷之一曰早學二曰午學三曰
晚學日輪篤實老成者二人平旦坐左右塾以序出入
食後復至日夕亦如之六行一曰孝二曰弟三曰謹四
曰信五曰愛衆六曰親仁六事一曰洒二曰掃三曰應
四曰對五曰進六曰退六藝一曰禮二曰樂三曰射四
曰御五曰書六曰數凡古樂雖不作矣猶存十一於千

百凡學必置樂器備八音畧如釋奠之數朔望或擊魯
薛鼓之半以習投壺或擊魯薛鼓之全以習射儀或做
釋奠之籥以舞勺或做干戚之制以舞象或習鼓琴或
習吹笙或審音於言如宮舌居中商口開張之類或審
音於聽如凡聽宮如牛鳴竇中凡聽商如離羣羊之類
或調聲詩以比琴瑟或講律呂大指皆是御則南方無
之即令北方士人亦不有事止將鳴和鸞逐水曲之類
講明可也平旦施早學之教誦書正句讀凡館堂設雲

板平旦教讀出就位擊雲板三聲生入立兩階下命洒掃畢復降階立原位觀其執事恭謹者錄之怠忽者教而責之次輪贊禮者二人先升堂正揖分班立先生之前唱序立諸生以序兩班升堂正立唱揖分班圍揖就位靜聲端立良久以觀德容執事者擊雲板命以次序坐務使從容嚴靜良久擊雲板命十人一班依齒序出就先生位前正立量其少長以小學直白教之使力行於身如曰君子則教之曰能學成好人便為君子不學

成好人便為小人其溫清定省之類亦教之曰汝能如此以禮待汝不能如此痛責不恕他如職分所能知能行者皆倣此令其口誦以上口為節乃命復位誦讀貴熟不貴多如資性能記千字以上者只讀六七百字不得盡其聰明年小者只教一二句而止或教孝經三字經不許用千字文千家姓幼學詩等書以次讀大學中庸論語孟子然後治經句讀少差必一一正之退食擊雲板各以班出揖而退出館後察其有疾行先長或倣

慢鄉里者責而教之食後施午學之教歌詩習書數凡
復午學升堂如平日儀就位立聽雲板命坐不必作對
句用顏魯公字體點畫照洪武正韻楷書詩經鹿鳴菁
莪關雎四牡伐木棠棣蓼莪采芣采蘋南山有臺緇衣
淇奧抑諸篇有關係可歌者各一篇或古體律詩絕句
情性正音律和者各二篇毋用金榜富貴等語亦十人
一班教以六書法如象形諧聲之類若年小則教認字
先其易者或書早學口誦者示之各寫倣書顏子一章

令端坐直筆正書務寬緩整肅而有壯氣其有傾歎粗弱者責而教之先生評品既畢領回就位將所書風雅及古體律詩絕句正音各讀成誦退食擊雲板如早學儀自後五日一次歌詩免寫字令善歌者為唱與衆同歌既成聲每班十人歌于先生之前用鐘鼓其餘笙簫琴瑟之類以漸教而和之未升歌者俱端坐靜聽歌畢者復位其聲容溫雅和平者賞之躁俗悲淫者責而教之或五日一次學算數亦免寫字年稍長者教以九章

算法年小者以四方上下自一至十或自甲至癸或自子至亥等教之午後施晚學之教溫書習禮儀凡復晚學如儀就位良久擊雲板命習禮每班十人出先生位前東西向立東先出位北面立長東少西揖拜拜畢復位西揖拜如儀退先生坐觀其容體恭敬舒遲者賞之鄙倍者責而教之如有善拜揖者免習仍教以子事父母禮如定省之類習禮畢各復位溫習早學所讀書自後五日一次教以古人嘉言善行一章如黃香扇枕陸

績懷橘之類直白說之令其靜嘿諦聽抵暮擊雲板直
日者徹先生書席如儀揖退諸生夜歸仍在燈下講誦
當日所教即以所教之事事親事長處事接物先生與
各父兄時常訪察如有徒能講誦不能力行者責而教
之若冠禮昏禮祭禮射禮鄉飲酒禮士相見禮投壺禮
皆用采色繪于壁為圖指示之月吉設先師位質明教
讀帥諸生行禮習禮樂乃休沐望亦如之凡不帥教者
月終聞于父老拜先師畢徹神位拜先生分班相揖而

退食後至館肄習諸禮或聽審音樂養其耳目血脈務使溫醇恭敬不至拘迫彼必樂從而無嬉戲逃避之事矣畢放假教之靜坐以求放心若四時之祭及高曾祖考忌日預期給假無故而逃學者一次罰書二百遍二次撻罰紙十張三次撻罰紙如前仍罰父兄過失小者先生宜端坐相對終日不與之語以冀其改乃止其好酒博奕逸遊驕縱或不帥教而悖逆非毀及于犯彛倫者重治之月終通將逃學有過姓名聞于父老甚者以聞

有司左右塾日考教讀善惡聞于父老因讀法而獎戒
之大者聞于縣治妄言者教讀一方師表非尠小矣以
身為本冠毋免衣毋袒毋苟顰笑毋奴其顏毋婢其膝
毋趨事有司下同臺隸其有口聖賢行狗彘考試則傳
遞者詞訟則教唆者倚師生之分索之不從而告官者
因惛惛之忿匿名毀紙變黑白者有一于茲不惟不能
化人而反賊人之子坐左右塾者察之以聞父老小則
因讀法而劇戒之大則聞于縣而罪斥之誣捏容隱並

罪善有大小必揚必覈大者縣小者亭歲莫罷館隆待
師之禮罷館父老與各父兄帥子弟拜送申待師之敬
束脩隨俗加厚若待不以禮不承權輿者父老痛責之
書于過籍甚者聞于縣教讀自告言者不聽其或前期
教讀醪金置酒高會裁尺牘進各父兄令各書贐錢此
乃市僧評物價者知縣不忍覩犯者罪之立大館帥子
弟之試有司者而祇教之興以三物一曰性行二曰經
義三曰才能選學官弟子則以名聞知縣嘗上書于朝

曰臣聞天下之人未有無所屬者也今日社學即使有賢守令法皆見之於行事皆出之於實亦不過一二學究率領三五豎子誦篇章句讀之言習拜揖唯諾之節而已其稍學文業舉者即喁然耻與其列故天下之人猶有無所屬者夫以欲動情勝之年重以科舉文字之習下不聞父師少師之誨而應對進退之儀已荒上未列祭菜鼓篋之儔而紛華盛麗之心先靡此孔子所以惡速成也臣欲修建社學擇諸生經明行修者為師驅

前二者屬之雖彼各安其居各便其師有不可強要使
朔望於此行禮而受說焉應對進退之間既得以董其
不度紛華盛麗之心亦得以潛消默化知乎朝廷立教
之意與乎聖賢為學之方有不專在於科舉者選補弟
子就取而擇之不屬於社學者不試今謬為令建學立
師篇章句讀與乎學文業舉既皆驅而屬之矣猶慮散
渙無統且有出於所驅之外故都擇立大館師一知縣
具書幣請起之凡欲就有司試者朔望皆習行禮受說

選補學官弟子不由大館大試其有性行雅飭經義純

正才能超異者特以名聞儀列于左

大館師不必皆設館者一言聽受終

身之師也其設館者旦夕朔望各如其儀又按子夏門人問文子張然則各社學遣子弟詣大館受說亦猶行

古之道也朔望前期設先師位質明先生先至立先師位前

西向父老坐左右塾序入擊雲板玉聲冠者童子以次

入立兩階下兩生升堂四拜先師四拜先生分立唱四

拜

先生弟子皆拜

唱撤神位唱布席

一生正凡先生南面坐

唱舉案

兩生舉先

前生唱登歌者就位

分立兩楹之下擊鐘鼓者皆上

唱進書

一生捧小學置于案上

唱諸生皆上

由兩階上重班立先生左右北上母越母華

唱請教

先生講立教一章

唱歌詩唱進茶唱請益

先生講明倫一章

唱歌詩唱進茶唱請

益

先生講敬身一章

唱歌詩唱進茶唱謝教

諸生以次降階

唱四拜唱

撤案少休或令諸生講書或與習禮審樂乃罷以次序出察其容貌比禮節奏比樂言辭舒朗義理暢達者書之比選補弟子員以三物興之與衆舉之

惠安政書十二

保甲篇

惟皇制建府置縣畫鄉分里以奠民庶乃立保甲以幾
奸禦亂疏國朝以里甲任民推擇齒德以為耆老里中
有盜戍卒罪人逋逃及惡人不能捕者里甲老人集衆
禽之具教民榜蓋時衛所以防大寇巡司兵以緝細奸
間有如所云不過老人里長帥甲首追胥申明亭外未
聞巡警舖里長甲首外未聞總小甲也總小甲立有司
祇以徒役煩之亦不能任盜賊故又變為保甲夫甲一
耳里變為舖舖變為總非所謂三保甲哉故予於鄉約

之衆甲而編之即以責之巡警而統於保長分鋪而隸不拘十甲一保之名則庶乎簡徑易遵哉保甲之職耆老掌邑中及各都之政令戒禁稽其萬民之衆寡六畜田賦辦其施舍與其可任者以作役事總甲司之以嚴扞御保長統之社首帥之聽于耆老國初因都分里徙不出鄉厥後民無恒宇不特甲首分裂四潰里長亦徙他都惟歲趨役可按籍求里中則不相攝故不得不隨地甲之勢也總甲得其職則保甲可以不立保甲立而

總甲終不能罷使保長為總甲則又赧然羞之蓋所執者猥瑣故耳今姑存總甲而責保長以扞御之事都必有鋪鋪有多寡鋪必有甲甲有多寡鋪立總甲一人小甲一人保長一人保副一人都立耆老一人社首一人總甲主傾謀小事若有羽檄之警保長副乃會其什以旗鼓兵革保於竟上社首者一社之首邑故其其號以帥各鋪保長乃以二物聯都邑之民而作之一曰牌二曰冊牌之式二曰各家曰十家冊之式三曰約曰鋪曰

保隨衆寡而登之正在有司

各家牌縣于門式具于左

惠安縣某坊都某舖

一戶某

係某坊都里長或里長某下甲首軍民匠灶等籍或某衛所某官下舍餘或某總小旗下軍餘若僧道亦放此其寓居人則必具原籍原鄉此寓居人與居住異客

一男子幾丁

內分老壯幼三等

某

官吏

某

作何生理

某

在某處買賣

某

生員

某

童生

某

有何手藝

某

見當某役

某

有何殘疾

一婦女幾口

無則不開

一田若干畝該糧若干石斗

一房屋門面幾間

或自置買或典賃某人居住

一寄住客某

係某府州縣人某年月日來家典住或寄歇作何生理或在某衙門充某

役或為人傭工陸續開填

一牛若干頭

一馬若干匹

以上三條無則不開

十家牌輪于甲

式具于後

惠安縣某坊某舖

某某籍

某某籍

某某籍

某某籍

某某籍

某某籍

某某籍

某某籍

某某籍

某某籍

或不能齊多寡寡一家不妨

左甲尾某

右甲頭某

牌皆書令告各家務要訓行六諭舉行四禮父慈子孝
兄愛弟敬夫和婦隨長惠幼順小心以奉官法勤力以
辦國課恭儉以守家業謙和以處鄉里心要平恕毋輕

起忿爭事要含忍毋輒興詞訟見善互相勸勉有惡互相懲戒務興禮讓之俗以成敦厚之風吾愧德政未敷徒以言教父老子弟其勉體之輪牌人每日告諭各家一次

職掌有見丁着業牌面沿門輪遞有司今不奉行右二牌者主文成公鎮虔時作也令家各置一牌十家聯為一牌甲內故有不良之人具聞于官官為置舍舊圖新簿第記姓名不念舊惡改乃削之竟內竊盜即令縱迹

不聞者治同甲之罪每日輪家直牌日夕持牌察十家之出入以告諭之止其訟解其爭不聽者聞官責治凡有誣告罪坐同甲善乎文成公之言曰十家牌式其法甚約其治甚廣盜賊可息詞訟可簡因是而修之補其偏而救其弊則賦役可均因是而修之連其伍而制其什則外侮可禦因是而修之警其薄而勸其厚則風俗可淳因是而修之道以德而訓以學則禮學可興故令舉之又十家牌原不立首以防脅制侵擾之弊後虞鄉

村盜賊增立保長統領平時各甲詞訟悉照牌諭保長無論今皆遵之或謂不督孰傳牌者予烏乎知事發直牌有罪

約冊耆老掌之登萬民之衆寡老幼貴賤而周知其數以教德行道藝而聽其治凡用衆庶察其不平與疾苦者

余觀往保甲冊少者一丁為戶多止二三謾以應有司督責耳嗟夫爾民有家男女長幼下至奚童有一不知

者乎余為民父母一夫一婦尚不知其居里族姓況知其情何以在上且爾之疑不過謂造版籍將舉而役我萬一有海上之警又將驅我於戎行嗟夫所不與百姓同心者有如日爾其余信無老幼貴賤咸登之蓋無事時屬而讀法則綱紀有條可以周知其孝順尊敬和睦教訓安生理作非為與否一旦有事什伍之法可起夫

人莫不顧其室廬妻子官不為甲爾民不自相率扞禦乎此但因民情而聯之而況余不竭作不遠戍而行之

不苛也凡冊所載必與牌相符其序如之或數村一甲

或一村厘為二三以衆寡為差寓居者鱗次其中

他縣他都

居民無間買屋賃屋未附籍者皆謂寓居已附者准土著論牌內寄住客乃典賃主人近室暫居附於主人不

另力

其有出居外都而戶籍在本都者別為一甲以附

於末各以其都為次止書丁口田畝彼都詳之又睦隣

者當先睦族以甲為聯鄰居通矣族安能皆比居也不

有散而當聚之乎然均一姓也而族分焉族姓不別則

宗道亂故於姓一而各為族者別之姓以族多少為次

族以丁多少為次蓋便稽閭此非序門第也其間各書職員生業而門第在其中矣族法先依昭穆世次以丁在而世先者為一世次而下至世未繼而止世長于族而年尤長者固以年長註之年長於族而世非長者亦以年長註之不拘世次蓋必在各世之首矣亦序昭穆中而寓序齒意也然一族中以世長者書之以年長者書之以為族人宗為其年其世而已至各書其職業則賢者貴者咸在又有事于公家而係于國籍者其里之

長書之其甲之首書之餘寄寓孤獨不遺則燦然而宗道備矣式具于左

某都

耆老一人社首一人保長幾人保副幾人總甲幾人小甲幾人舖幾甲幾村幾家幾丁幾老幾壯幾幼幾別甲都幾村幾家幾丁幾老幾壯幾幼幾姓幾族幾耆老某社首某

某舖

在某村巡至某村某村止共若干村

保長一人保副一人總甲一人小甲二人甲幾村
幾家幾丁幾老幾壯幾幼幾

保長某 保副某 總甲某 小甲某某

第一甲

村幾家幾丁幾老幾壯幾幼幾

某村

第一家某

或本地或寓居并籍貫等俱如牌開

男子幾丁

老壯幼并職業殘疾等俱如牌開

婦女幾口 田

屋 寄住 牛 馬

以上俱
如牌開

第二家某

如前

某村

若一村滿甲
者不必過村

第三家

如前至第
十家止

第二甲

如前盡
甲而止

某舖

如前盡
舖而止

別甲

此出寓外都者隨多寡書
之不拘十家為甲之例

都幾村幾家幾丁幾老幾壯幾幼幾

某都某村

一家某

原某里長甲首某戶
丁或自為戶出寓

男婦

老壯幼并職業殘疾等俱照彼都牌
冊開具田屋牛馬等不聞彼都詳之

某都某村

一家某

如前盡
家而止

姓族

趙姓幾族

一族

某戶團居某村散居某某村里
長幾戶甲首幾戶共戶幾丁多

一世趙甲

某甲里長
農工等

趙乙

某甲甲前
商賈等

二世趙丙

本族年
長鄉官

趙丁

生員
等

三世趙戊

出居
某都

一族

如前

一世趙己

本族年長
某甲里
長甲首農工等

二世三世

如前

一族

某戶某甲里長
甲首或
戶丁畸零盡族而止

一世二世三世

如前

錢姓幾族

盡姓
而止

一族

如前盡族而止

一世二世三世

如前

舖冊總甲司之以約冊舍其貴者賢者服公事者老者
幼者疾者以起徒役歲役不過一日夜聚櫟而巡之禦
相翔者幾不時不物者禁箕歛汝則有常刑按巡警者
行巡警警云爾令惟城中不廢各都則否歲第應役于
公城中以車馬輻輳最苛如往庭燎幄次畚版繕梁治
道竹木等皆責辦于舖甚至官府以事至于竟上擊鮮

具食故總甲箕斂細民歲有常余始禁之嗚呼巡警能
舉其職烏用保甲而第以役苦之何也故據鄉約冊凡
有職役之人與夫老幼殘疾皆免籍其壯者城中每鋪
夜五人巡警如故各都各鋪亦隨地方近者五人遠者
十人巡警或登樓而望或沿鄉以巡不行者罪在總甲
官府行都飲食自具竹木等平價若其它役不可已者
以序而當歲役不得過一日總甲科斂重罪城中役煩
各鋪人丁多寡不同故余彙而為一更夫自隨其鋪各

都簡僻有經年無事者亦各隨舖可也式具于左

某舖

總甲某小甲某某

某村幾家幾壯丁幾

更夫

每夜五人或十人周而復始

雜役

年役一日僻鄉役不列者次年役起

某村

某

輪過即註名下曰某月某夜輪過

輪過即註名下曰某月某日輪過某役

某

如前

如前

某村

某

前如

某

前如

約冊有盡免者難依其甲但隨村列之盡數而止
保冊保長統之社首帥之以鋪冊三而用之有警以旗
鼓戈戟待于境上息則止禁侵暴汝則有常刑成周之
兵止于伍兩今軍已養於民又有弓兵機兵又行保甲
百姓不知其意得無眊眊不樂乎夫保甲者豈誠苟安

遠鬪若兵也哉寇至扞禦乃有家者之必然何為不樂
故余因其情而簡其法以舖冊三壯丁共當一夫登于
保冊無事巡警如故有警社首保長統帥冊內夫家更
迭而出或據險而守或乘便而擊或以傾賊等役冊內
不籍其名止云某某某三家出夫一名某某某等三家
出夫二名某某二家出夫一名某某二家出夫三名某
一家出夫一名或二三名之類羨者附之歸于以三當
一一出而兩休耳蓋有常數無常人各推其家之壯者

為兵不惟三代之法則然名不定于官府亦所以使其
樂從也保長第統鄉夫禦寇無事時不相統為一都或
數保長乃以社首帥之平居亦不相攝敢侵暴者重治
之在城不入保冊有事盡乘城耳式具于左

某舖

保長某保副某總甲某小甲某某

甲幾村幾家幾夫幾

第一甲一村

如二三村
次第書之

某村

某某某三家共出鄉夫一名

某某某三家共出鄉夫二名

某某二家共出鄉夫一名

某某二家共出鄉夫三名

以下隨多寡書之

第二甲二村

盡甲而止

某村

某一家出鄉夫一名

某村

某一家出鄉夫三名

以下隨多寡書之

右三家出夫一名則一家一丁可知也三家出夫
二名則各二丁二家出夫一名必一家一而一家
二也二家出夫三名必一家五而一家四或一家
二而一家七或一家八而一家一也二家出夫一
必其三丁一家出夫三名必九丁可知也餘各以
意推之凡甲以夫論不以家甲可過村夫不可過

金匱要略卷之七
恐其不便若有羨丁以四當一即不足以五當二
可也兵法不可無統如約甲則不能蓋彼家丁有
多寡耳今自為甲保冊保長執之社首但帥保長
凡冊各具其事于縣

乃以八事糾在社之民而勸懲之

一曰遵戒諭

見前以下

多本兵憲喬公挈令

二曰嚴譏察

盜賊之生無論強竊皆聚巖林僻處兼以豪族淵藪
家甲以不與已忍之甚有闌出相通今要互相譏察
凡有蹤迹不明異言異服者即行首連得實與獲盜
同賞否者事發連坐其賭博教唆造言生事等并察
之

三曰謹巡邏

城中舖輪五人各都舖達者又加五人每夜擊柝傳
更一更三點

閉閭
禁行

五更三點放行遇非常則呵止之

鄉閭曠野暴客非數人能制馳報望樓擊鼓警言衆
四曰聯守望

城郭坊巷鄉村各於要地置鼓一面若鄉村相去稍
遠者仍建高樓置鼓其上遇警即登樓擊鼓一巷擊
鼓各巷應之一村擊鼓各村應之但聞鼓擊各甲各
執器械齊出應援俱聽保長調度有後期不出者保
長公同各甲告官重治其或屯守必於綰轂之處蓋
守此地則內盡可無虞矣不得以舍此戍彼為辭如

有恃強撓衆者罪

五曰時操練

遇警社首保長帥壯丁以操習之事息則止不聽操練與社首保長因而侵擾者各罪衣甲戈戟乃守家所有者自備之

六曰均勞費

貴人巨室盜所垂涎宜厲家衆以為民望及資器械膏火等費不得自便獨苦細民抗者有法

七曰禁侵暴


社首保長等愚懦不足與計事雄俊者往往倚以為奸今宜變更助令為治有以自效不敢相負侵漁小民者考案寘法令亦帥先衆僚毋令求盜等與其事有橋符者以告治之

八曰治奸讒

竟中盜賊閭里輕俠惡保長等發其根株窟穴每以報復虛喝豪傑大姓據執自尊與愚民不用命者亦

各挾持長短謗議蠢起故保長等以家為念畏縮不
事阻墮公法令有如此必重治之

保甲古之遺法明道令晉城量鄉里遠近為保伍使
之力役相助患難相恤奸偽無所容孤寡老疾者責
親黨使無失所行旅出於其途疾病皆有所養即此
及臨川督民操練使自備衣甲器械天下始騷然矣
故今以鄉約為主雖或操練以備盜賊而以不擾行
之若夫寬假以圖成效則惟在委任哉



石洞集卷七